

## Dāṭhāvamsō

Namo tassa bhagavato arahato sammāsambuddhassa

1. Visāradam vādapathāti vattinam,  
Tilokapajjotamasayhasāhinam;  
Asesa ñeyyāvaraṇappahāyinam,  
Namāmi satthāramanantagocaram.
2. Tiloka nāthappabhavam bhayāpavam,  
Visuddhavijjācaraṇehi sevitam;  
Papañca saṃyojanabandhanacchidam,  
Namāmi dhammam nipuṇam sududdasam.
3. Pasādamattena'pi yattha pāṇino,  
Phūsanti dukkhakkhayamaccutam padam;  
Tamāhuṇeyyam susamāhitindriyam,  
Namāmi saṅgham munirājasāvakam.
4. Vibhusayam kāḷakanāgaranva yam,  
Parakkamo kāruṇiko camūpati;  
Gavesamāno jinasāsanassa yo,  
Virūḷhimatthañca janassa patthayam.
5. Sudhāmayūkhāmala paṇḍuvamsajam,  
Virūḷhasaddham munirājasāsane;  
Piyam vadam nītipathānuvattinim,  
Sadā pajānam janikam'va mātaram.
6. Piyam parakkantibhujassa rājino,  
Mahesi maccunnatakhuddhisampadam;  
Vidhāya līlavatimicchitatthadam,  
Asesa laṅkātarajjalakkhiyam.
7. Kumāramārādhitasādhumantinaṃ,  
Mahādayam paṇḍunarinda vamsajam;  
Vidhāya saddham madhurindanāmakam,  
Susikkhitam pāvacane kalāsu ca.
8. Narindasuñṇam suciram tisīhaḷam,  
Itippaṭṭitam ayasam apānudi;  
Ciram paṇītena ca civarādinā,  
Susañṇate saṃyamino atappayi.
9. Ciraṭṭhitim pāvacanassa icchatā,  
Katañṇunā vikkama buddisālinā;  
Satīmatā candīma bandhukittinā,  
Sagāravam tena'bhīyācito aham.
10. Sadesa bhāsāya kavīhi sīhaḷe,  
Katampi vamsam jinadantadhātuyā;  
Niruttiyā māgadhikāya vuddhiyā,  
Karomi dīpantaravāsinaṃ api.
11. Jīno'yamidde amaravhaye pure,

Kadāci hutvāna sumedhanāmako;  
 Savedavedaṅgavibhāgakovido,  
 Mahaddhane vippakulamhi māṇavo.

12. Ahañhi jātibyasanena pīlito,  
 Jarābhibhuto maraṇena otthaṭo;  
 Sivaṃ padaṃ jātijarādinissaṭaṃ,  
 Gavesayissaṃ'ti raho vicintiya.
13. Anekasaṅkhaṃ dhanadhaññasampadaṃ,  
 Paṭiṭṭhapetvā kapaṇesi duccajaṃ;  
 Anappake pemabharānubandhino,  
 Vihāya mitte ca suteca bandhave.
14. Pahāya kāme nikhile manorame,  
 Gharābhinnikkhamma himācalantike;  
 Mahīdharaṃ dhammikanāma vissutaṃ,  
 Upecca nānātarurājibhusitaṃ.
15. Manonukūle surarājanimmīte,  
 Asammigānaṃ agatimhi assame;  
 Nivattacīro ajinakkhipaṃ vahaṃ,  
 Jaṭādhara tāpasa vesamaggahī.
16. Susaṅṅatattoparivāri tindriyo,  
 Phalāphalādīhi pavattayaṃ tanuṃ;  
 Gato abhiṅṅāsu ca pāramiṃ vasī,  
 Tahiṃ samāpatti sukhaṃ avindī so.
17. Susajjite rammaṇpurādhivāsina,  
 Mahājanena'ttamanena añjase;  
 Pathappadese abhiyantamattano,  
 Anīṭṭhiteyeva sumedha tāpaso.
18. Agādhāṇeyyodadhīpāradassinaṃ,  
 Bhavantaṃ nibbanathaṃ vināyakaṃ;  
 Anekakhīṇāsavalakkhasevitaṃ,  
 Kadā ci dīpaṅkarabuddhamaddasa.
19. Tato sasaṅghassa tilokabhattuno,  
 Pariccajivāna tanumpi jīvitaṃ;  
 Pasārayitvāna jaṭājīnādikaṃ,  
 Vidhāya setuṃ tanumeva pallale.
20. Anakkamitvā kalalaṃ mahādaye,  
 Sabhikkhuko gaccatu piṭṭhiyā iti;  
 Adhiṭṭhahitvāna nipannako tahiṃ,  
 Anātha metaṃ tibhavaṃ samekkhiya.
21. Dayāya saṅcoditamānaso jane,  
 Bhavaṇṇavā uddharituṃ dukhaddite;  
 Akāsi sambodhipadassa pattiyā,  
 Mahābhinihāramudaggavikkamo.
22. Atho viditvā vasino tamāsayaṃ,

Adāsi so vyākaraṇaṃ mahāmuni;  
Tato puraṃ tamhi tathāgate gate,  
Sayamaṃvasī sammasi pāramiguṇe.

23. Tato ca kappānamalīnavikkamo,  
Asaṃkhiye so caturo salakkhake;  
Tahiṃ tahiṃ jātisū bodhipācane,  
Visuddhasambhāraguṇe apūrayi;  
Athābhijāto tusite mahāyaso,  
Visuddhasambodhipadopaladdhiyā;  
Udikkhamāno samayaṃ dayādhanō,  
Ciraṃ vibhutiṃ anubhosi sabbaso.
25. Sahassasaṅkhā dasacakkavālato,  
Samāgatānekasurādhipādīhi;  
Udagguḍaggehi jinattapattiyā,  
Sagāraṃ so abhigamma yācito.
26. Tato cavitvā kaṇṇavhaye pure,  
Sadā sato sakyakulekaketuno;  
Ahoṣi suddhodanabhumibhattuno,  
Mahādimāyāya mahesiyā suto.
27. Vijātamatto'va vasundharāya so,  
Paṭiṭṭhahitvāna disā vilokayī;  
Tadā ahesuṃ vivaṭaṅganā disā,  
Apūjayuṃ tattha ca devamānūsā.
28. Ādhārayuṃ ātapavāraṇādikaṃ,  
Adissamānāva nabhambhi devatā;  
Padāni so satta ca uttarāmukho,  
Upecca nicchārayi vācamāsabhiṃ.
29. Yathatthasiddhattakumāranāmako,  
Mahabbalo yobbanahāriviggaho;  
Ututtayānucchavikesu tīsu so,  
Nubhosi pāsādavaresu sampadaṃ.
30. Kadāci uyyānapathe jarāhataṃ,  
Tathāturaṃ kālakatañca saṃyamim;  
Kamena disvāna virattamānaso,  
Bhavesu so pabbajituṃ akāmayi.
31. Sapupphadīpādīkarehi rattiyaṃ,  
Purakkhato so tidivādhivāsīhi;  
Sachannako kantakavājjīyānato,  
Tato mahākāruṇiko'bhinikkhami.
32. Kamena patvāna anomamāpagaṃ,  
Sudhotamuttāphalahārisekate;  
Paṭiṭṭhahitvā varamoḷibandhanaṃ,  
Sītāsīlūnaṃ gagane samukkipī.
33. Paṭiggahetvā tidasānamissaro,  
Suvaṇṇacaṅgoṭavarena taṃ tadā;

- Tiyojanaṃ nīlamaṇīhi cetiyaṃ,  
Akāsi cūlāmaṇimattano pure.
34. Tato ghaṭṭikārasarojayoninā,  
Samāhaṭṭaṃ dhārayī cīvarādikaṃ;  
Atha sakaṃ vatthayugaṃ nabhatthale,  
Pasatthavesaggahaṇo samukkkhipī.
35. Paṭiggahetvāna tamambujāsano,  
Mahiddhiko bhattibharena codito;  
Sake bhava dvādasayojanaṃ akā,  
Maṇīhi nīlādihi dussacetiyaṃ.
36. Susaṅṅatatto satimā jitindriyo,  
Vinītaveso rasagedhavajjito;  
Chahāyanāneva anomavikkamo,  
Mahāpadhānaṃ padahittha dukkaraṃ.
37. Visākhamaśassatha puṇṇamāsiyaṃ,  
Upecca mūlaṃ sahaṃjāya bodhiyā;  
Tiṇāsane cuddasahatthasammite,  
Adhiṭṭhahitvā vīriyaṃ nisajji so.
38. Avattharantiṃ vasudhaṃca ambaraṃ,  
Virūpavesaggahaṇena bhimsanaṃ;  
Pakampayanto sadharādharaṃ mahiṃ,  
Jino padose'jini māravāhiṇiṃ.
39. Surāsurabrahmagāṇehi sajjite,  
Jagattaye pupphamayagaghikādinā;  
Pavattamāne suradundubhissare,  
Abujjhibodhiṃ rajanīparikkhaye.
40. Tadā pakampiṃsu saselakānanā,  
Sahassasaṃkhā dasalokadhātuyo;  
Agaṇṇi so loṇapayodhi sādhuṭaṃ,  
Mahāvabhāso bhuvanesu pattharī.
41. Labhiṃsu andhā vimale vilocane,  
Suṇiṃsu sadde badhirāpi jātiyā;  
Lapiṃsu mūgā vacanena vaggunā,  
Cariṃsu khelaṃ padasā'va paṅgulā.
42. Bhaviṃsu khujjā ujusommaviggahā,  
Sikhī'pi nibbāyi avīciādisu;  
Apāgamuṃ bandhanato'pi jantavo,  
Khudādikaṃ petabhavā apakkamī.
43. Samiṃsu rogavyasanāni pāṇinaṃ,  
Bhayaṃ tiraccānagate na pīlayī;  
Janā ahesuṃ sakhilā piyaṃvadā,  
Pavattayūṃ koṇcanadaṃ mataṅgajā.
44. Hayā ca hesiṃsu pahaṭṭhamānasā,  
Nadiṃsu sabbā sayameva dundubhī;

- Raviṃsu dehābharaṇāni pāṇinaṃ,  
Disā pasīdiṃsu samā samantato.
45. Pavāyi mando sukhasītamāruto,  
Pavassi meggho'pi akālasambavo;  
Jahiṃsu ākāsagatiṃ vihaṅgamā,  
Mahiṃ samubhijjajalaṃ samuṭṭhahī.
46. Asandamānā'va ṭhitā savantiyo,  
Nabhe virocīṃsu asesajotiyo;  
Bhavā ahesuṃ vivaṭā samantato,  
Janassa nāsuṃ vacanūpapattiyo.
47. Samekkhataṃ nāvarenaṃ nagādayo,  
Pavāyi gandho api dībbasammato;  
Dumā ahesuṃ phalapuppha dhārino,  
Ahoṣi channo kamalehi aṇṇavo.
48. Thalesu toyesu ca pupphamānakā,  
Vicittapupphā vikasiṃsu sabbathā;  
Nirantaraṃ pupphasugandhavuṭṭhiyā,  
Ahoṣi sabbhaṃ vasudhambarannaraṃ.
49. Nisajja pallaṅkavare tahiṃ jino,  
Sukhaṃ samāpattivihārasambhavaṃ;  
Tato'nubhonto sucirābhipatthitaṃ,  
Dināni satteva atikkamāpayī.
50. Samuppativā gagaṇaṅganaṃ tato,  
Padassayivā yamaṃ mahāmuni;  
Sapāṭihīraṃ tidivādhivāsinaṃ,  
Jinattane saṃsayitaṃ nirākari.
51. Athotarivāna jayāsanassa so,  
Ṭhito'va pubbuttarakaṇṇanissito;  
Dināni sattānimisena cakkhunā,  
Tamāsaṇaṃ bodhitaruṃca'pūjayi.
52. Atha'ntarāle maṇicaṅkame jino,  
Ṭhitappadesassa ca āsanassa ca;  
Mahārahe devavarābhinimmitte,  
Dināni satteva akāsi vaṅkamaṃ.
53. Tato disāyaṃ aparāya bodhiyā,  
Upāvisitvā ratanālaye jino;  
Samantapaṭṭhānanayaṃ vicintayaṃ,  
Dināni satteva savītināmayi.
54. Viniggato satthusarīrato tadā,  
Jutippabandho paṭibandhavajjito;  
Pamāṇasuññāsu ca lokadhātusu,  
Samantato uddhamadho ca pattharī.
55. Vaṭassa mūle ajapālasaṅṅino,  
Sukhaṃ phusanto pavivekasambhavaṃ;

Vināyako satta vihāsi vāsare,  
Anantadassī surarājapūjito.

56. Vihāsi mūle mucalindasākhino,  
Nisajja bhogāvalimandirodare;  
Vikiṇṇapupphe mucalindabhogino,  
Samādhinā vāsarasattakaṃ jino.
57. Dume'pi rājāyatane samādhinā,  
Vihāsi rattindiva sattaṃ muni;  
Sahassanetto atha dantapoṇakaṃ,  
Mukhodakañcāpi adāsi satthuno.
58. Tato mahārājavarehi ābhatam,  
Silāmayam patta catukkamekakaṃ;  
Vidhāya mattham madhupiṇḍikaṃ tahiṃ,  
Paṭiggahetvāna savāṇijāhaṭā.
59. Katannakicco saraṇesu te ubho,  
Patiṭṭhapetvāna tapassubhallike;  
Adāsi tesam abhipūjituṃ sakaṃ,  
Parāmasitvāna siraṃ siroruhe.
60. Vaṭassamule ajapālasaññino,  
Sahampatībrahmavarena yācito;  
Janassa kātuṃ varadhammasaṅgahaṃ,  
Agañchi bārāṇasimekako muni.
61. Gantvā so dhammarājā vanamisipatanaṃ saññatānaṃ nikaṃ,  
Pallaṅkasmim nisinno tahimavicalitaṭṭhānasampāditamhi;  
Āsālhe puṇṇamāyaṃ sitaruciruciyaṃ jotite cakkavāle,  
Devabrahmādikānaṃ duritamalaharaṃ vattayi dhammacakkaṃ.
62. Sutvā saddhammaggaṃ tibhūvanakuharābhogavitthārikaṃ taṃ,  
Aññākoṇḍaññanāmadvijamunipamukhāṭṭhārasabrahmakoti;  
Aññāsuṃ maggadhammaṃ parimitarahite cakkavāle uḷāro,  
Obhāso pātubhuto sapadi bahuviddhaṃ āsi accherakañca.

Paṭhamo paricchedo.

63. Tato paṭṭhāya so sathā vinento devamānuse,  
Bodhito phussamāsamhi navame puṇṇamāsiyaṃ.
64. Laṅkamāgamma gaṅgāya tīre yojanavitthate,  
Mahānāgavanuyyāne āyāmena tiyojane.
65. Yakkhānaṃ samitiṃ gantvā ṭhatvāna gagane tahiṃ;  
Vātandhakāravuṭṭhihi katvā yakkhe bhayaddite.
66. Laddhābhayehi yakkhehi tehi dinnāya bhumiya;  
Cammakhaṇḍaṃ pasāretvā nisīditvāna taṅkhaṇe.
67. Cammakhaṇḍaṃ padittaggi jālāmālāsamākulaṃ;  
Iddhiyā vaḍḍhayitvāna yāva sindhuṃ samantato.

68. Javena sindhuvelāya rāsibhute nisācare;  
Giridīpamidhānetvā patiṭṭhāpesi te tahiṃ.
69. Desayitvā jino dhammaṃ tadā devasamāgame;  
Bahunnaṃ pāṇakoṭīnaṃ dhammābhisamayaṃ akā.
70. Mahāsumanadevassa sele sumanakūṭake;  
Datvā namassituṃ kese agā jetavanaṃ jino.
71. Patiṭṭhapetvā te satthu nisinnāsanabhumiyaṃ;  
Indanīlamayaṃ thūpaṃ karitvā so apūjayi.
72. Nissāya maṇipallaṅkaṃ pabbataṇṇavavāsino;  
Disvā yuddhatthike nāge cūḷodara mahodare.
73. Bodhito pañcame vasse cittamāse mahāmuni;  
Uposathe kālapakkhe nāgadīpamupāgamī.
74. Tadā samiddhisumano devo jetavane ṭhitam;  
Attano bhavanaṃyeva rājāyatanapādapaṃ.
75. Indanīladdikūṭam'va gahetvātuṭṭhamānaso;  
Dhārayitvā sahāgañchi chattaṃ katvāna satthuno.
76. Ubhinnaṃ nāgarājūnaṃ vattamāne mahāhave;  
Nisanno gagane nātho māpayittha mahātamaṃ.
77. Ālokaṃ dassayitvātha assāsetvāna bhogino;  
Sāmaggikaraṇaṃ dhammaṃ abhāsi purisāsabho.
78. Asītkoṭīyo nāgā acalambudhivāsino;  
Patiṭṭhahiṃsu muditā sīlesu saraṇesu ca.
79. Datvāna maṇipallaṅkaṃ satthuno bhujagādhipā;  
Tatthāsīnaṃ mahāvīraṃ annapānehi tappayum.
80. Patiṭṭhapetvā so tattha rājāyatanapādapaṃ;  
Pallaṅkaṃ tañca nāgānaṃ adāsi abhipūjituṃ.
81. Bodhito aṭṭhame vasse vesākhe puṇṇamāsiyaṃ;  
Maṇiakkhikanāmena nāgindena nimantito.
82. Nāgarājassa tasseva bhavanaṃ sādhu sajjītaṃ;  
Kalyāṇiyaṃ pañcabhikkhū satehi saha āgami.
83. Kalyāṇicetiyaṭṭhāne kate ratana maṇḍape;  
Mahārahamhi pallaṅke upāvisi narāsabho.
84. Dibbehi khajjabhojjehi sasaṅghaṃ lokanāyakaṃ;  
Santappesi phaṇindo so bhujāngehi purakkhato.
85. Desayitvāna saddhammaṃ saggamokkhasukhāvahaṃ;  
So satthā sumane kūṭe dassesi padalañchanaṃ.
86. Tato pabbatapādamaṃhi sasaṅgho so vināyako;  
Divāvihāraṃ katvāna dīghavāpiṃ upāgami.

87. Thūpaṭṭhāne tahiṃ buddho sasaṅgho' bhinisīdiya;  
Samāpatti samubabbutaṃ avindi asamaṃ sukhaṃ.
88. Mahābodhitaruṭṭhāne samādhiṃ appayi jino;  
Mahāthūpappadese ca viharittha samādhinā.
89. Thūpārāmaṃhi thūpassa ṭhāne jhānasukhena so;  
Sabhikkhusaṅgho sambuddho muhuttaṃ vītināmayī.
90. Silāthupappadesamhi ṭhatvākālāvidū muni;  
Deve samanusāsivā tato jetavanaṃ agā.
91. Agiddho lābhasakkāre asayhamavamānaṃ;  
Sahanto kevalaṃ sabba lokanittaraṇatthiko.
92. Saṃvaccharāni ṭhatvāna cattāḷisaṅca pañca ca;  
Desayitvāna suttādi navaṅgaṃ satthusāsaṃ.
93. Tāretvā bhavakantārā jane saṅkhyātivattino;  
Buddhakiccāni sabbāni niṭṭhāpetvāna cakkhumā.
94. Kusinārāpure raññaṃ mallānamupavattane;  
Sālavanamhi yamakasālarukkhānamantare.
95. Mahārahe supaññatte mañce uttarasīsakaṃ;  
Nipanno sīhaseyyāya vesākhe puṇṇamāsiyaṃ.
96. Desetvā paṭhame yāme mallānaṃ dhammamuttamaṃ;  
Subhaddaṃ majjhime yāme pāpetvā amataṃ padaṃ.
97. Bhikkhu pacchimayāmaṃhi dhammakkhandaṃ asesake;  
Saṅgha ovaditvāna appamāda padena ca.
98. Paccusasamaye jhānasamāpattivihārato;  
Uṭṭhāya parinibbāyi sesopādivivajjito.
99. Mahākampādayo āsuṃ tadā acchariyāvahā;  
Pūjāvisesā vattiṃsu devamānusakā bahū.
100. Parinibbāṇasuttante vuttānukkamato pana;  
Pūjāviseso viññeyyo icchantehi asesato.
101. Ahatehi ca vatthehi veṭhetvā paṭhamaṃ jinaṃ;  
Veṭhayitvāna kappāsapicunā vihatena ca.
102. Evaṃ pañcasatakkhattuṃ veṭhayitvāna sādhuṃ;  
Pakkhipitvā suvaṇṇāya telapuṇṇāya doṇiyā.
103. Vīsaṃhatthasatubbedhaṃ gandhadārūhi saṅkhatāṃ;  
Āropayimṃsu citakaṃ mallānaṃ pamukhā tadā.
104. Mahākassapatherena dhammarāje avandite;  
Citakaṃ mā jalitthāti devadhiṭṭhānato pana.
105. Pāmokkhā mallarājūnaṃ vāyamantopa' nekadhā;  
Citakaṃ taṃ na sakkhimṃsu gāhāpetuṃ hutāsaṃ.



106. Mahākassapatherena adhiṭṭhānena attano;  
Vatthādīni mahādoṇiṃ citakañca mahārahaṃ.
107. Dvidhā katvāna nikkhamma sakasīse patiṭṭhitā;  
Vanditā satthuno pādā yathāṭṭhāne patiṭṭhitā.
108. Tato devānubhāvena pajjalittha citānalo;  
Na masi satthudehassa daḍḍhassāsi na chārikā.
109. Dhātuyo avasissimṣu muttābhā kañcanappabhā;  
Adiṭṭhānena buddhassa vippakinnā anekadhā.
110. Uṇhīsaṃ akkhakā dve ca catasso dantadhātuyo;  
Icctē dhātuyo satta vippakinnā na satthuno.
111. Ākāsato patitvāpi uggantvāpi mahītālā;  
Samantā jaladhārāyo nibbāpesuṃ citānalaṃ.
112. Therassa sārīputtassa antevāsi mahiddhiko;  
Sarabhunāmako thero pabhinna paṭisambhido.
113. Gīvādhatuṃ gahetvāna citato mahiyaṅgaṇe;  
Patiṭṭhapetvā thūpamhi akā kañcukacetiyaṃ.
114. Khemavhayo kāruṇiko khīṇasaṃyojano muni;  
Citakā to tato vāmadāṭṭhādhatuṃ samaggahi.
115. Aṭṭhannamatha rājunaṃ dhātuatthāya satthuno;  
Uppannaṃ viggahaṃ doṇo sametvāna dvijuttamo.
116. Katvāna aṭṭha koṭṭhāse bhājetvā sesadhātuyo;  
Adāsi aṭṭharājūnaṃ taṃ taṃ nagaravāsinaṃ.
117. Haṭṭhatuṭṭhā gahetvāna dhātuyo tā narādhipā;  
Gantvā sake sake raṭṭhe cetiyāni akārayuṃ.
118. Ekā dāṭhā surindena ekā gandhāravāsīhi;  
Ekā bhujāṅgarājūhi āsi sakkatapūjītā.
119. Dantadhātuṃ tato khemo attanā gahitaṃ adā;  
Dantapure kaliṅgassa brahmadattassa rājino.
120. Desayitvāna so dhammaṃ bhettvā sabbā kudiṭṭhiyo;  
Rājānaṃ taṃ pasādesi aggambhī ratanattaye.
121. Ajjhogālho munindassa dhammāmatamahaṇṇavaṃ;  
So narindopavāhesi malaṃ maccharyādikaṃ.
122. Pāvussako yathā megho nānā ratanavassato;  
Dāḷiddiyanidāghaṃ so nibbāpesi naruttamo.
123. Suvaṇṇakhacitālamba muttājālehi sobhitaṃ;  
Kūṭāgārasatākīṇṇaṃ taruṇādiccasannibhaṃ.
124. Nānāratanasobhāya dudikkhaṃ cakkhumūsaṃ;  
Yānaṃ saggāpavaggassa pasādātisayāvahaṃ.

125. Kārayitvāna so rājā dāṭhādhatunivesanaṃ;  
Dhātupīṭhañca tattheva kāretvā ratanujjalaṃ.
126. Tahim samappayitvāna dāṭhādhatuṃ mahesino;  
Pūjāvattūhi pūjesi rattindivamatandito.
127. Iti so sañcinitvāna puññasambhāra sampadaṃ;  
Jahitvā mānusaṃ dehaṃ saggakāyamalaṅkari.
128. Anujāto tato tassa kāsirājavhayo suto;  
Rajjaṃ laddhā amaccānaṃ sokasallamaṇudī.
129. Puppahagandhādinā dantadhātuṃ tamabhipūjīya;  
Niccaṃ maṇippadīpehi jotayi dhātumandiraṃ.
130. Iccevamādiṃ so rājā katvā kusalasañcayaṃ;  
Jahitvāna nijaṃ dehaṃ devindapuramajjhagā.
131. Sunando nāma rājindo ānandajanano satamaṃ;  
Tassa'trajo tato āsi buddhasāsanamāmako.
132. Sammānetvāna so dantadhātuṃ ñeyyantadassino;  
Mahatā bhattiyogena agā devasahavyataṃ.
133. Tato parañca aññe'pi bahavo vasudhādhipā;  
Dantadhātuṃ munindassa kamena abhipūjayamaṃ.
134. Guhasīvavhayo rājā duratikkama sāsano;  
Tato rajjasiriṃ patvā anugaṇhi mahājanaṃ.
135. Saparatthānabhiññe so lābhasakkāralolupe;  
Māyāvino avijjandhe nigaṇthe samupaṭṭhahi.
136. Vassāratte yathā cando mohakkhandhena āvaṭo;  
Nāsakkhī guṇaraṃsīhi jalitamaṃ so narāsabho.
137. Dhammamaggā apete'pi pavitṭhe ditṭhikānanaṃ;  
Tasmaṃ sādhuṃ pathamaṃ aññe nātivattimaṃsu paṇino
138. Hematoraṇamālāhi dhajehi kadalihi ca;  
Puppahagaghiyehi'nekehi sajjetvā nāgarā puramaṃ
139. Maṅgalatthuti ghosehi naccagītādikehi ca;  
Hemarūpiyapupphehi gandhacuṇṇādikehi ca.
140. Pūjentā munirājassa dāṭhādhatuṃ kudācanaṃ;  
Akaṃsu ekanigghosaṃ saṃvaṭṭambudhisannibhamaṃ.
141. Ugghāṭetvā narindo so pāsāde sihapañjaraṃ;  
Passanto janamaddakkhī pūjāvīdhiparāyaṇamaṃ.
142. Athāmaccaśabhāmajetdha rājā vimbhīta mānaso;  
Kotuhalākulo hutvā idaṃ vacanamabravī.
143. Accherakaṃ kimetanna kīdisamaṃ pāṭihāriyamaṃ;  
Mametaṃ nagaraṃ kasmā chaṇanissitakaṃ iti.

144. Tato amacco ācikkhi medhāvī buddhamāmako;  
Rājino tassa sambuddhānubhāvamavijānato.
145. Sabbābhibhussabuddassa tanhāsāṅkayadassino;  
Eṣā dhātu mahārāja khemattherena āhaṭṭā.
146. Taṃ dhātuṃ pūjayitvāna rājāno pubbakā idha;  
Kalyāṇamitte nissāya devakāyamupāgamuṃ.
147. Nāgarāpi ime sabbe samparāya sukattikā;  
Pūjayanti samāgamma dhātuṃ taṃ satthuno iti.
148. Tassāmacassa so rājā sutvā dhammaṃ subhāsitaṃ;  
Dulladdhīmalamujjhivā pasīdi ratanattaye.
149. Dhātupūjaṃ karonto so rājā acchariyā vahaṃ;  
Titthiye dummane'kāsi sumane cetare jane.
150. Ime ahirikā sabbe saddhādiguṇavajjitā;  
Thaddhā saṭṭhā ca duppaññā saggamokkhavibandhakā.
151. Iti so cintayitvāna guhasīvo narādhipo;  
Pabbājesi sakā raṭṭhā nigaṇṭhe te asesake.
152. Tato nigṇṭhā sabbe'pi ghatasittānalā yathā;  
Kodhaggijalitā'gañchuṃ puraṃ pāṭaliputtakaṃ.
153. Tattha rājā mahātejo jambudīpassa issaro;  
Paṇḍunāmo tadā āsi anantabalavāhaṇo.
154. Kodhandhātha nigaṇṭhā te sabbe pesuññakārakā;  
Upasaṅkamma rājānaṃ idaṃ vacanamabravuṃ.
155. Sabbadevamanussehi vandanīye mahiddhike;  
Sivabrahmādayo deve niccaṃ tumhe namassatha.
156. Tuyhaṃ sāmantabhupālo guhasīvo panādhunā;  
Nindanno tādise deve chavaṭṭhiṃ vandate iti.
157. Sutvāna vacanaṃ tesam rājā kodhavasānugo;  
Sūraṃ sāmantabhūpālaṃ cittayānamatha'bravī.
158. Kaliṅgaratṭhaṃ gantvāna guhasīvamidhānaya;  
Pūjitaṃ taṃ chavaṭṭhiṃca tena rattindivaṃ iti.
159. Cittayāno tato rājā mahatiṃ caturaṅginim;  
Sannayahitvā sakaṃ senaṃ purā tamhābhinikkhami.
160. Gantvāna so mahīpālo senaṅgehi purakkhato;  
Dantapurassāvidūre khandhāvāraṃ nivesayi.
161. Sutvā āgamaṃ tassa kaliṅgo so mahipati;  
Gajindapābhatādihi taṃ tosesi narādhipaṃ.
162. Hitajjhāsayaṃ nātvā guhasīvassa rājino;  
Dantapuraṃ cittayāno saddhiṃ senāya pāvīsi.

163. Pākāragopuraṭṭālapāsādagaghikacittitaṃ;  
Dānasālāhi so rājā samiddhaṃ puramaddasa.
164. Tato so sumano gantvā pavitṭho rājamandiraṃ;  
Guhāsīvassa ācikkhi paṇḍurājassa sāsanaṃ.
165. Sutvāna sāsanaṃ tassa dāruṇaṃ duratikkamaṃ;  
Pasannamukhavaṇṇo'va cittayānaṃ samabravī.
166. Sabbalokahitathāya maṃsanettādidānato;  
Anappakappe sambhāre sambharitvā atandito.
167. Jetvā namucino senaṃ patvā sabbāsavakkhayaṃ;  
Anāvarenañāṇena sabbadhammesu pārāgu.
168. Diṭṭhadhammasukassādaṃ agaṇetvāna attano;  
Dhammanāvāya tāresi janataṃ yo bhavaṇṇavā.
169. Devātidevaṃ taṃ buddhaṃ saraṇaṃ sabbapāṇinaṃ;  
Jano hi avajānanto addhā so vañcito iti.
170. Icevamādiṃ sutvāna so rājā satthuvaṇṇanaṃ;  
Ānandassuppabandhehi pavedesi pasannataṃ.
171. Guhasīvo pasannaṃ taṃ cittayānaṃ udikkhiya;  
Tena saddhiṃ mahagghaṃ taṃ agamā dhātumandiraṃ.
172. Haricandanasambhutaṃ dvārabāhādikehi ca;  
Pavāḷavāḷamālāhi lambamuttālatāhi ca.
173. Indanīlakavāṭehi maṇikiṅkiṅikāhi ca;  
Sovaṇṇakaṇṇamālāhi sobhitaṃ maṇithūpikaṃ.
174. Uccaṃ veluriyubbhāsi chadanaṃ makarākulaṃ;  
Dhātumandiramaddakkhi ratanujjala pīṭhakaṃ.
175. Tato setātapattassa heṭṭhā ratanacittitaṃ;  
Disvā dhātukaraṇḍaṅca tuṭṭho vimbhayamajjhagā.
176. Tato kaliṅganātho so vivarivā karaṇḍakaṃ;  
Mahītale nihantvāna dakkhiṇaṃ jānumaṇḍalaṃ.
177. Añjaliṃ paggahetvāna guṇe dasabalādike;  
Saritvā buddhaseṭṭhassa akāsi abhiyācanaṃ.
178. Gaṇḍambarukkhāmūlamhi tayā titthīyamaddane;  
Yamaṃ dassayantena pāṭihāriyamabbhutaṃ.
179. Pubbakāyādinikkhantajalānalasamākulaṃ;  
Cakkavāḷaṅgaṇaṃ katvā janā sabbe pasādītā.
180. Desetvāna tayo māse abhidhammaṃ sudhāsinaṃ;  
Nagaraṃ otarantena saṅkassaṃ tāvatimsato.
181. Chattavāmarasaṅkhādīgāhakehi anekadhā;  
Brahmadevāsuraḍḍhi pūjitena tayā pana.

182. Thatvāna maṇisopāṇe vissakammābhinimmitte;  
Lokavivaraṇaṃ nāma dassitaṃ pāṭihāriyaṃ.
183. Tathānekesu thānesu munirāja tayāpuna;  
Bahūni pāṭihirāni dassitāni sayambhunā.
184. Pāṭihāriyamajjāpi saggamokkhasukhāvahaṃ;  
Passantānaṃ manussānaṃ dassanīyaṃ tayā iti.
185. Abbhuggantvā gagaṇa kuharaṃ candalekhābhirāmā,  
Vissajjenti rajata dhavalā raṃsiyo dantadhātu;  
Dhūpāyanti sapadi bahudhā pajjalantī muhuttaṃ,  
Nibbāyantī nayanāsubhagaṃ pāṭihīraṃ akāsi.
186. Accheraṃ taṃ parama ruciraṃ cittayāno narindo,  
Disvā haṭṭho ciraparicitaṃ diṭṭhijālaṃ jahitvā;  
Gantvā buddhaṃ saraṇamasamaṃ sabbaseṇīhi saddhiṃ,  
Aggaṃ puññaṃ pasavi bahudhā dhātusammānanāya.

#### Dutiyo paricchedo

187. Tato kaliṅgādhipatissa tassasocittayānoparamappatīto;  
Taṃ sāsanaṃ paṇḍunarādhipassa ñāpesi dhīro duratikkamaṃ'ti.
188. Rājātato dantapuraṃ dhajehi pupphehi dhūpehi ca toraṇehi;  
Alaṅkaritvāna mahāvitāna nivāritādiccamarīcijālaṃ.
189. Assuppabandhāvutalocanehi purakkhato negama nāgarehi;  
Samubbahanto sirasā nijena mahārahaṃ dhātukaraṇḍakaṃ taṃ.
190. Samussitodāra sitātapattaṃ saṅkhodarodāta turaṅgayuttaṃ;  
Rathaṃ navādiccasamānavāṇṇa māruyha cittattharaṇābhirāmaṃ.
191. Anekasaṅkhehi balehi saddhiṃ velātivattambudhisannibhehi;  
Nivattamānassa bahujanassa vināpi dehaṃ manasānuyāto
192. Susanthataṃ sabbadhivālūkāhi susajjitaṃ puṇṇa ghaṭṭādikehi;  
Pupphābhikiṇṇaṃ paṭipajji dīghaṃ suvitthataṃ pāṭaliputtamaggaṃ.
193. Kaliṅghanātho kusumādikehi naccehi gītehi ca vāditehi;  
Dine dine addhani dantadhātuṃ pūjesi saddhiṃ vanadevatāhi.
194. Suduggamaṃ sindhumahīdharehi kamena maddhānamatikkamitvā;  
Ādāya dhātuṃ manujādhinātho agā puraṃ pāṭali puttanaṃ.
195. Rājādhiraṃ'tha sabhāya majjhe disvāna taṃ vītabhayaṃ visaṅkaṃ;  
Kaliṅgarājaṃ paṭighābhibhuto abhāsi pesuññakare nigaṇṭhe
196. Deve jahitvāna namassanīye chavaṭṭhimetena namassitaṃ'taṃ;  
Aṅgārāsimhi sajotibhūte nikkhippa khippaṃ dahathādhuneti.
197. Pahatṭhacittā'vatato nigaṇṭhārājaṅgaṇe te mahatiṃ gabhīraṃ;  
Vītaccikaṅgāraka rāsi puṇṇaṃ aṅgārakāsuṃ abhisāṅkharimṣu.
198. Samantato pajjalitāya tāya sajotiyā roruvabheravāya;  
Mohandhabhutaṃ atha titthiyā te taṃ dantadhātuṃ abhinikkhipimṣu.

199. Tassānubhāvena tamaggīrāsīm hetvā sarojaṃ rathacakkamattam;  
Samantato uggatareṇujāla muṭṭhāsi kiṇṇakkha bharābhirāmaṃ.
200. Tasmim khāṇe paṅkaja kaṇṇikāya patiṭṭhahitvā jinadantadhātu;  
Kundāvadātāhi pabhāhi sabbā disā pabhāsesi pabhassarāhi.
201. Disvāna taṃ acchariyaṃ manussā pasannacittā ratanādikehi;  
Sampūjayitvā jinadantadhātuṃ sakaṃ sakaṃ diṭṭhimavossajimsu.
202. So paṇḍurājā pana diṭṭhijālaṃ cirānubaddhaṃ apariccajanto;  
Patiṭṭhapetvā dhikaraññametam kuṭena ghātāpayi dantadhātuṃ.
203. Tassaṃ nimuggā dhikaraññamesā upaḍḍhabhāge naca dissamānā;  
Pubbācalaṭṭho va sudhāmarīci jotesi raṃsīhi disā samantā.
204. Disvānubhāvaṃ jinadantadhātu yāpajji so vimbhaya maggarājā;  
Eko tha issāpasuto nigaṇṭho taṃ rājarājānamidaṃ avoca.
205. Rāmādayo deva janaddanassa nānāvatarā bhuvane ahesuṃ;  
Tassekadeso ca idaṃ chavaṭṭhinoce nubhāvokathamīdisoti.
206. Addhā manussattamupāgatassa devassa pacchā tidivaṃ gatassa;  
Dehekadeso ṭhapito hitatthametanti saccaṃvacanaṃbhavēyya.
207. Saṃvaṇṇayitvāna guṇe pahūte nārāyaṇassa ssamahiddhikassa;  
Nimuggametthā dhikaraññametamsampassato mebahinīharitvā.
208. Sampādayitvāna mahājanānaṃ mukhāni paṅkeruhasundarāni;  
Yaṭicchitam gaṇhatha vatthujātam iccāha rājā mukhare nigaṇṭhe.
209. Te titthiyā viṇahusuraṃ guṇehi vicitta rūpehi abhitthavitvā;  
Toyena siñciṃsu saṭhā tathāpi ṭhitappadesā na calittha dhātu.
210. Jigucchamāno atha te nigaṇṭhe so dhātuyānīharaṇe upāyaṃ;  
Anvesamāno vasudhādhinātho bherim carāpesi sake puramhi.
211. Nimuggametthā dhikaraññamajji yo dhātumetaṃ bahi nīhareyya;  
Laddhāna so issariyaṃ mahantaṃ raññosakāsāsukhamessatīti
212. Sutvā na taṃ bheriravaṃuḷāraṃpuṇaṇṇatthikobuddhabalepasanno;  
Tasmim pure seṭṭhisuto subhaddo pāvekkhirañño samitim pagabbho.
213. Tamaggarājaṃ atha so namitvā sāmājikānaṃ hadayaṅgamāya;  
Bhāsāya sabbaññuguṇappabhāvaṃ vaṇṇesi sārājjavimutta citto.
214. Bhumim kiṇitvā mahatā dhanena manoramaṃ jetavanaṃ vihāraṃ;  
Yo kārayitvāna jinassa datvā upaṭṭhahi taṃ catupaccayehi.
215. Anāthapiṇḍippadaseṭṭhiseṭṭhosodiṭṭhadhammopapitāmahome;  
Tilokanāthe mama dhammarāje tumhe dhunāpassathabhattibhāraṃ.
216. Itthaṃ naditvāna pahūtapañeññā katvāna ekamsamathuttarīyaṃ;  
Mahītaṃ dakkhiṇajānukena āhacca baddhañjaliko avoca.
217. Chaddantanāgo savisena viddho sallena yo lohitaṃakkhi taṅgo;  
Chabbaṇṇaraṃsīhi samujjalante chetvāna luddāya adāsi dante.

218. Saso'pi hutvāna visuddhasīlo ajjhataḍānābhirato dvijāya;  
Yo'dajjidehampi sakaṃ nipacca aṅgārarāsimhi bubhukkhitāya.
219. Yo bodhiyā bāhiraṅgānā atittarūpo sivrāja seṭṭho;  
Adāsi cakkhūni pabhassarāni dvijāya jīṇṇāya acakkhukāya.
220. Yokhantivādī'pi kalāburāje chedāpayante'pi sahatthapādaṃ;  
Pariplutaṅgorudhire titikkhimettāyamāno yasadāyake'va.
221. Yo dhammapālo api sattaṃsā jātōpaduṭṭhe janakesakamhi;  
Kārāpayante asimālakammaṃ cittaṃ na dūsesi patāparāje.
222. Sākhāṃigo yo asatā pumena vane papātā sayamuddhaṅga;  
Silāya bhinne'pi sake lalāṅge taṃ khemabhumiṃ anayitthamūlhaṃ.
223. Ruṭṭhena mārena'bhiniṃmitampi aṅgākāsaṃ jalitaṃ vihijja;  
Samuṭṭhite sajjumahāravinde ṭhatvāna yo seṭṭhi adāsi dānaṃ.
224. Migena yenāpeviṅṅamekaṃ bhītaṃvadhāṃmocaṃyitūṃkuraṅgiṃ;  
Āghātane attasiraṃṭhapetvāpamocitā'ññāpipāṇisaṅghā.
225. Yo sattaṃvasso visikhāya paṃsu kīlāparo sambhavanāṃako'pi;  
Sabbāññulīḥāya nigulhapañhaṃ puṭṭho viyākāsi sucīratena.
226. Hitvā nikantiṃ sakajīvite'pi baddhāsakucchimhi ca vettavallīṃ;  
Sākhāṃige nekasahassasaṅkhe vadhāpamocesi kapissaroyo.
227. Santappayaṃ dhammasudhārasena yo mānuse tuṅḍilasūkaro'pi;  
Isī'va katvā atha ṅāyaganthaṃ nijaṃ pavattesi cirāya dhammaṃ.
228. Paccatthikaṃ puṇṇakayakkhamuggaṃ mahiddhikaṃ kāmaguṇesu giddhaṃ;  
Yo tikkhapañṇovidhurābhidhānodamesi kāḷāgirimattakamhi.
229. Kulāvasāyi avirūlhapakkho yo buddhimā vaṭṭakapotako'pi;  
Saccena dāvaggimabhijjalantaṃ vassena nibbāpayi vārido'va.
230. Yo maccharājāpi avuṭṭhikāledisvānamacche tasitekilante;  
Saccenavākyenamahoghapuṇṇaṃmuhuttamattenaakāsiraṭṭhaṃ.
231. Vicittahatthassa rathādikāni vasundharā kampana kāraṇāni;  
Putte'nujāte sadisecadāreyo'dajjivessantarajātiyampi.
232. Buddho bhavitvā api diṭṭhadhamma sukhānapekkho karuṇānuvattī;  
Sabbhaṃ sahanto avamānanādiṃ yodukkaraṃ lokahitaṃakāsi.
233. Balena saddhiṃ caturaṅgikena abhiddavantaṃ atibhiṃsanena;  
Ajeyyasatthaṃ paramiddhipattaṃ dāsesi yo ālavakampī yakkhaṃ.
234. Dehābhiniṃkhanta hutāsanacci mālakulaṃ brahmabhavaṃ karitvā;  
Bhetvāna diṭṭhiṃ sucirānubaddhaṃ dāsesi yo brahmavaraṃ munindo.
235. Accaṅkusaṃ dānasudhota gaṇḍaṃ nipātitaṭṭhālaka gopurādiṃ;  
Dhāvantaṃmagge dhanapālahatthiṃ dāsesi yo dāraṇamantaṃ'va.
236. Manussarattāraṇapāṇipādamukkippa khaggaṃ anubandhamānaṃ;  
Mahādayo duppasahaṃ parehi dāsesi yo aṅgulimālacoraṃ.

237. Yo dhammarājā vijitārisaṅgho pavattayanto varadhammacakkam;  
Saddhamma saññaṃ ratanākaraṅca ogāhayī saṃ parisam samaggaṃ.
238. Tasseva saddhamma varādhipassatathāgatassa' ppaṭipuggalassa;  
Anantaññaṃassa visāradassa esā mahākāruṅikassa dhātu.
239. Anena saccena jinassa dhātu khippaṃ samāruyha nabhantarāḷaṃ;  
Sudhamasulekheva samujjalanti kaṅkhaṃ vinodetu mahājanassa.
240. Tasmim̄ khaṇe sā jinadantadhātu nabhaṃ samuggamma pabhāsayantī;  
Sabbā disā osadhitarakā' va janaṃ pasādesi vtiṇṇakaṅkhaṃ.
241. Athotaritvā gaganāṅgaṇamhā sā matthake seṭṭhisutassa tassa;  
Patiṭṭhahitvāna sudhābhisittagattaṃ' va taṃ pīṇayi bhattitinnam̄.
242. Dasvāna taṃ acchariyaṃ nigaṇṭhā iccabravuṃ paṇḍunarādhipaṃ taṃ;  
Vijjābalaṃ seṭṭhisutassa etaṃ na dhātuyā deva ayampabhāvo.
243. Nisamma tesam̄ vacanaṃ narindo iccabravī seṭṭhisutaṃ subhaddaṃ;  
Yathā ca ete abhisaddaheyyuṃ tathāvidhaṃ dassaya iddhimaññaṃ.
244. Tato subhaddo tapanīyapatte sugandhisītodakapūritamhi;  
Vaḍḍhesi dhātuṃ munipuṅgavassa anussaranto caritabbhutanī.
245. Sā rājahaṃ sī' va vidhāvamānā sugandhitoyamhi padakkhiṇena;  
Ummujjamānā ca nimujjamānā jane pamodassudhare akāsi.
246. Tato ca kāsuṃ visikhāyamajjhe katvā tahiṃ dhātumabhikkhipitvā;  
Paṃsūhi sammā abhipūrayitvā bahūhi maddāpayi kuṅjarehi.
247. Bhetvā mahiṃuṭṭhahi cakkamattaṃ virājamānaṃ maṇikaṇṇikāya;  
Pabhassaraṃ rūpiyakesarehi sarorahaṃ kañcanapattapālīṃ.
248. Patiṭṭhabhitvāna tahiṃ saroje mandānilāvattitareṇu jāle;  
Obhāsayanti' va disā pabhāhi diṭṭhā muhuttena jinassadhātu.
249. Khipiṃsu vatthābharaṇāni maccā pavassayuṃ pupphamayaṅca vassaṃ;  
Ukkuṭṭhisaddehi ca sadhukāranādehi puṇṇaṃ nagaraṃ akaṃsu.
250. Te titthiyā taṃ abhivañcanaṃ' ti rājādhirājaṃ atha saññaṃpetvā;  
Jigucchanīye kuṇapādikehi khipiṃsu dhātuṃ parikhāya piṭṭhe.
251. Tasmim̄ khaṇe pañcavidhambujehisañchāditāhaṃsagaṇopabhuttā;  
Madhubbatālī virutābhirāmā ahosi sā pokkharaṇī' va nandā.
252. Gajādhipā koññcaravaṃ raviṃsu kariṃsu hesāninadaṃ turaṅgā;  
Ukkuṭṭhinādaṃ akarīṃsu maccā suvādītā dundubhiādayo' pi.
253. Thomiṃsu maccā thutigītakehi nacciṃsu ottappavibhusanā' pi;  
Vatthāni sīse bhamayiṃsu mattā bhujāni poṭhesumudaggacittā.
254. Dhūpehi kālāgarusambhavehi ghanāvanaddhaṃ' va nabhaṃ ahosi;  
Samussitānekadhajāvalīhi puraṃ tadā vatthamayaṃ' va āsi.
255. Disvā tamaccheramacintanīyaṃ āmoditāmaccagaṇā samaggā;  
Atthe niyojetu mupecca tassa vadiṃsu paṇḍussa narādhipassa.



256. Disvāna yo īdisakampi rāja iddhānubhāvaṃ munipuṅgavassa;  
Pasādamattampi kareyya noce kimatthiyā tassa bhaveyya paññā.
257. Pasādanīyesu guṇesu rāja pasādanaṃ sādhujanassa dhammo;  
Pupphanti sabbe sayameva vande samuggate komudakānanāni.
258. Vācāya tesam pana dummatīnaṃ mā saggamaggaṃ pajahittha rāja;  
Andhe gahetvā vicareyya ko hi anvesamāno supathaṃ amūlho.
259. Narādhipā kappiṇa bimbisāra suddhodaṇādi api tejavantā;  
Taṃ dhammarājaṃ saraṇaṃ upecca pivimsu dhammāmatamādarena.
260. Sahassanetto tidasādhipo'pi khīṇāyuko khiṇabhavaṃ munindaṃ;  
Upecca dhammaṃ vimalaṃ nisamma alattha āyuṃ api diṭṭhadhammo.
261. Tuvampi tasmim jītapañcamāre devātideve varadhammarāje;  
Saggāpavaggaḍhigamāya khippaṃ cittaṃ pasādehi narādhirāja.
262. Sutvānatesaṃ vacanaṃ narindo vikiṇṇakaḍkho ratanattayamhi;  
Senāpatiṃ atthavaraṃ avoca pahaṭṭhabhāvo parisāya majjhe.
263. Asaddahāno ratanattayassa guṇe bhavacchedanakāraṇassa;  
Cirāya dulladdhipathe caranto ṭhito sarajje api vañcītohaṃ.
264. Mohena khajjopanaṃ dhamesiṃ sītaddito dhumasikhe jalante;  
Pipāsīto sindhujalaṃ pahāya pivim pamādena marīcītoyaṃ.
265. Pariccajivā amataṃ cirāya jivatthiko tikkhavisam akhādiṃ;  
Vihāya'haṃ campakapupphadāmaṃ adhārayim jattusu nāgabhāraṃ.
266. Gantvāna khippaṃ parikhā samīpaṃ ārādhayitvā jinadantadhātuṃ;  
Ānehi pūjāvidhinā karissaṃ puññāni sabbattha sukhāvahāni.
267. Gantvātesoparikhāsamīpaṃ senādhinātho paramappatīto;  
Dhātuṃ munindassa namassamāno ajjhesi rañño hitamā caranto
268. Cirāgataṃ diṭṭhimalaṃ pahāya alattha saddhaṃ sugate narindo;  
Pasādamāgamaṃ pasādamassa vaḍḍhehi rañño ratanattayamhi.
269. Tasmim khaṇe pokkharāṇī vicittā phullehi sovaṇṇasaroruhehi;  
Alaṅkarontī ganaṃ ahosi mandākinīvābhīnavāvatārā.
270. Haṃsaṅgaṇevātha munindadhātu sā paṅkajā paṅkajamokkamanti;  
Kundāvadātāhi pabhāhi sabbaṃ khirodakucchiṃ'va puraṃ akāsi.
271. Tato surattañjalipaṅkajamhi patiṭṭhahitvāna camupatissa;  
Sandissamānā mahatā janena mahapphalaṃ mānusaṃ akattha.
272. Sutvāna vuttantamimaṃ narindo pahaṭṭhabhāvopadasā'va gantvā;  
Saṃsūcayanto diguṇaṃ pasādaṃ suvimhitopañjalikoavoca.
273. Vohāradakkhā manuṇā muninda saṅghaṭṭayitvā nīkasopalamhi;  
Karontiaggaṃ varakañcanaṃ esohi dhammo caritopurāṇo.
274. Maṇim pasatthākarasambhavampi hutāsakammehabhīsaṅkharitvā;  
Pāpentirājaññakirīṭakoṭim vibhusanattaṃ vidunomanussā.

275. Vīmaṃsanatthāya tavādhunāpi mayā kataṃ sabbamidaṃ muninda;  
Āguṃ mahantaṃ khama bhuripaṇṇa khippaṃ mamālaṅkuru uttamaṅgaṃ.
276. Patiṭṭhitā tassa tato kirīte maṇippabhā bhāsini dantadhātu;  
Amuñci raṃsī dhavalā pajāsu sinehajātā iva khīradhārā.
277. So dantadhātuṃ sirasāvahanto padakkhiṇaṃtaṃnagaraṃ karitvā;  
Sampūjayanto kusumādikehi susajjitante puramāharittha.
278. Samussitodārasitātapatte pallaṅkaseṭṭhe ratanujjalami;  
Patiṭṭhapetvāna jinassa dhātuṃ pūjesi rājā ratanādikehi.
279. Buddhādivatthuttayameva rājā āpāṇakoṭiṃ saraṇaṃ upecca;  
Hitvā vihimsaṃ karuṇādhivāso ārādhayī sabbajanaṃ guṇehi.
280. Kāresi nānāratanaṃpabhāhi sahasasaraṃsīm'va virocamaṇaṃ;  
Narādhīpo bhattibharānurūpaṃ sucittitaṃ dhātunivesanampi.
281. Vaḍḍhesi so dhātugharamhi dhātuṃ alaṅkaritvā sakalaṃ purampi;  
Sesena pūjāvīdhiṇā atitto pūjesi raṭṭhaṃ sadhanaṃ sabhoggaṃ.
282. Āmantayitvā guhasīvarājaṃ sammānitaṃ attasamaṃ karitvā;  
Dānādikaṃ puññaṃanekarūpaṃ saddhādhanā sañciṇirājaseṭṭho.
283. Tato so bhupālo kumatijanasamaṃsaggamaṇaṃ,  
Nirākatvā magge sugatavacanujjotasugame;  
Padhāvanto sammā saparahitasampatticaturo,  
Pasatthaṃ lokatthaṃ acari caritāvajjitajano.
- Tatiyo paricchedo.
284. Carati dharaṇi pāle rājadhāmmesu tasmim,  
Samaracaturaseno khīradhāro narindo;  
Nijabhujabalalīlā'rātidappappamāthī,  
Vibhavajjanitamāno yuddhasajjo'bhigañchi.
285. Karivaramatha disvā so guhādvārayātaṃ,  
Paṭibhayarहितatto sīharājā'va rājā;  
Nijanagarasamīpāyātametam narindaṃ,  
Amitabalamamahoghenottharantā'bhiyāyi.
286. Uditabahaḷadhūlīpālīruddhantaḷikkho,  
Samadavividhayodhārāvasaṃrambhābhīme;  
Nisitasarasatālīvassadhārākarāḷe,  
Ajini mahati yuddhe paṇḍuko khīradhāraṃ.
287. Atha narapatiseṭṭho saṅgahetvāna raṭṭhaṃ,  
Nija tanuja varasmiṃ rājabhāraṃ nidhāya;  
Sugata dasana dhātuṃ sampaṭicchāpayitvā,  
Pahiṇi ca guhasīvaṃ sakkaritvā saraṭṭhaṃ.
288. Suviramavanīpālo saññaṃamaṃ ajjhupeto,  
Vividha vibhava dānāyācake tappayitvā;  
Tidasapura samājaṃ dehabhedā payāto,  
Kusala phalamanappaṃ patthitaṃ paccalatta.

289. Narapati guhasīvo taṃ munindassa dhātum,  
Sakapuramupanetvā sādhu sammāyanto;  
Sugati gamana magge paṇino yojayanto,  
Sucarita mabhirūpaṃ sañciṇanto vihāsi.
290. Aṅaṇitamahimassujje niraṇṇo tanūjo,  
Purima vayasi yevāraddhasaddhābhiyogo;  
Dasabala tanudhātum pūjitem tassa raṇṇo,  
Puravara mupāyāto dantanāmo kumāro.
291. Guṇajanita pasādaṃ taṃ kaliṅgādhinātham,  
Nikhila guṇa nivāso so kumāro karitvā;  
Vividha mahavidhānaṃ sādhusampādayanto,  
Avasi sugatadhātum anvahaṃ vandamāno.
292. Abhavi ca guhasīvassāvanīsassa dhitā,  
Vikaca kuvalayakkhī haṃsakantābhiyātā;  
Vadana jita sarojā hāridhammillabhārā,  
Kucabharanamitaṅgi hema mālābhidhānā.
293. Akhilaguṇanidhānaṃ bandhubhāvānurūpaṃ,  
Suvimalakulajātaṃ taṃ kumāraṃ veditvā;  
Narapati guhasīvo attano dhītaraṃ taṃ,  
Adadi sabahumānaṃ rājaputtassa tassa.
294. Manujapati kumāraṃ dhāturakkhādhiḥkāre,  
Pacuraparijanaṃ taṃ sabbathā yojayitvā;  
Gava mahisa sahasādīhi sampiṇayitvā,  
Saka vibhava sarikkhe issaratte ṭhapesi.
295. Samarabhuvi vinaṭṭhe khīradhāre narinde,  
Malayavanamupetā bhāḡineyyā kumārā;  
Pabala mati mahantaṃ saṃharitvā balaggaṃ,  
Upapuramupagañchum dhātuyā gaṇhanatthaṃ.
296. Atha nagarasamīpe te nivesaṃ karitvā,  
Savaṇakaṭukametam sāsanaṃ pesayimsu;  
Sugatadasanadhātum dehi vā khippamamhaṃ,  
Yasasirijanaṃ vā kīḷa saṅgāmakeḷiṃ.
297. Sapadi dharaṇipālo sāsanaṃ taṃ suṇitvā,  
Avadi rahasi vācaṃ rājaputtassa tassa;  
Nahi sati mama dehe dhātumaññassa dassaṃ,  
Ahamapi yadi jetum neva te sakkuṇeyyaṃ.
298. Suranara namitaṃ taṃ dantadhātum gahetvā,  
Gahita dijavilāso sīhaḷaṃ yāhi dīpaṃ;  
Iti vacanamudāraṃ mātulassātha sutvā,  
Tamavaca guhasīvaṃ dantanāmo kumāro.
299. Tavaca mamaca ko vā sīhaḷe bandhubhūto,  
Jinavaraṇasaroje bhattiyutto ca kovā;  
Jalanīdhiparatīre sīhaḷaṃ khuddadesaṃ,  
Kathamahamatinessaṃ dantadhātum jinassa.

300. Tamavadi guhasīvo bhāgineyyaṃ kumāraṃ,  
Dasabalatanudhātu saṅghitā sīhaḷasmiṃ;  
Bhavabhayahatidakkho vattate satthudhammo,  
Gaṇanapathamatīā bhikkhavo cāvasiṃsu.
301. Mama ca piyasahāyo so mahāsena rājā,  
Jinacaraṇasarojadvandasevābhiyutto;  
Salilamapi ca phuṭṭhaṃ dhātuyā patthayanto,  
Vividharatanajātaṃ pābhatam pesayittha.
302. Pabhavati manujindo sabbadā buddhimā so,  
Sugatadasanadhātuṃ pūjituṃ pūjaneyyaṃ;  
Paricitavisayamhā vipavutthaṃ bhavantam,  
Vividhavibhavadānā sādhu saṅgaṇhituñca.
303. Nija duhitupatiṃ taṃ itthamārādhayitvā,  
Narapati guhasīvo saṅgahetvāna senam;  
Raṇadharāṇimupeto so kumārehi saddhiṃ,  
Maraṇaparavasattam ajjhagā yujjhamāno.
304. Atha narapati putto dantanāmo suṇitvā,  
Savaṇa kaṭukametaṃ mātulassappavattiṃ;  
Gahita dijavilāso dantadhātuṃ gahetvā,  
Turita turita bhūto so puramhā paḷāyi.
305. Sarabhasa mupagantvā dakkhiṇam cātha desaṃ,  
Avicalitasabhāvo iddhiyā devatānaṃ;  
Nadimatimahatiṃ so uttaritvāna puṇṇam,  
Nidahi dasanadhātuṃ vālukārāsimaṃjhe.
306. Puna puramupagantvā taṃ gahītaññavesam,  
Bharyamapi gahetvā āgato tattha khippam;  
Sugatadasanadhātuṃ vālukāthupakucchiṃ,  
Ṭhapitamupacaranto acchi gumbantarasmim.
307. Sapadi nabhasi thero gacchamāno paneko,  
Vividhakiraṇajālam vālukārāsithūpā;  
Aviraḷitamudentam dhātuyā tāya disvā,  
Paṇami sugatadhātuṃ otarivāna tattha.
308. Munisutamatha disvā jampatī te patītā,  
Nijagamanavidhānam sabbamārocayimṃsu;  
Dasabalatanujo so dhāturakkhā niyutto,  
Parahitaniratatto te ubho ajjhabhāsi.
309. Dasabalatanudhātuṃ sīhaḷam netha tumhe,  
Agaṇita tanukhedā vītasārajjametam;  
Api ca gamanamagge jātamatte vighāte,  
Saratha mamamanekopaddavacchedadakkham.
310. Iti sugatananūjo jampatīnam kathetvā,  
Puna'pi tadanurūpaṃ desayitvāna dhammam;  
Puthutaramapanetvā sokasallañca gāḷham,  
Sakavasatimupeto antalikkhena dhīro.

311. Bhujagabhavanavāsī ninnagāyātha tassā,  
Bhujagapati mahiddhi paṇḍuhārābhīdhāno;  
Sakapurapavaramhā nikkhamitvā caranto,  
Samupagami tadā taṃ ṭhānamicchāvasena.
312. Vimalapulinathūpā so samuggacchamānaṃ,  
Sasirucīramarīcījjālamālokayitvā;  
Ṭhitamatha munidhātuṃ vālukārasigabbhe,  
Kimidamiti sakaṅkhaṃ pekkhamāno avedi.
313. Sapadi sabahumāno so asandissamāno,  
Ratanamayakaraṇaṃ dhātuyuttaṃ gilitvā;  
Vitataputhuladeho bhogamālāhi tuṅgaṃ,  
Kaṇakasikharirājaṃ veṭṭhayitvā sayittha.
314. Salilanidhisamīpaṃ jampaṭī gantukāmā,  
Pulinatalagataṃ taṃ dantadhātuṃ adisvā;  
Nayanasaliladhāraṃ sokaḷātaṃ kirantā,  
Sugatasutavaraṃ taṃ taṅkhaṇe' nussariṃsu.
315. Atha sugatasuto so cintitaṃ saṃviditvā,  
Agamī savidhamesaṃ sokadinānanānaṃ;  
Asuṇi ca jinadhātuṃ vālukārāsīmajjhe,  
Nīhitamapi aditṭhaṃ pūjitaṃ jampaṭīhi.
316. Sayitamatha yatīso dibbacakkhuppabhāvā,  
Ratanagirinikuṅṅe nāgarājaṃ apassi;  
Vihagapatīsarīraṃ māpayi tammuhutte,  
Vitataputhulapakkhena' nṭalikkhaṃ thakentaṃ.
317. Jaladhimatigabhīraṃ taṃ dvidhā so karitvā,  
Pabalapavanavegena' ttano pakkhajena;  
Sarabhasa mahidhāvaṃ bhīmasaṃrambhayogā,  
Abhigami bhujagindaṃ merupāde nipannaṃ.
318. Jahitabhujagaveso taṅkhaṇe so phaṇindo,  
Paṭibhayacakitatto saṃkhipitvāna bhoge;  
Sarabhasa mupagantvā tassa pāde namitvā,  
Vinayamadhuramitthaṃ taṃ munīsaṃ avoca.
319. Sakalajanahitatthaṃ eva jāyanti buddhā,  
Bhavati janahitatthaṃ dhātumattassa pūjā;  
Ahamapi jinadhātuṃ pūjayitvā mahagghaṃ,  
Kusalaphalamanappaṃ saṅciṇissaṃ' ti gaṇhiṃ.
320. Atha manujagaṇānaṃ saccabodhārahānaṃ,  
Vasatibhavanamesā nīyyate sīhaḷaṃ taṃ;  
Munivaratanudhātuṃ tena dehīti vutto,  
Bhujagapati karaṇaṃ dhātugabbhaṃ adajji.
321. Vihagapatitanaṃ taṃ saṃharitvāna thero,  
Jalacarasatabhīmā aṇṇavā uppatitvā;  
Sakalathavacikke rajjalakkhiṃ' va dhātuṃ,  
Narapatitanujānaṃ jampaṭīnaṃ adāsi.

322. Iti katabahukāre saṃyaminde payāte,  
Sugatadasanadhātuṃ muddhanā ubbahantā;  
Mahati vipinadevādīhi magge payutte,  
Vividhamahavidhāne te tato nikkhamiṃsu.
323. Mudusurabhīsamīro kaṇṭakādivyapeto,  
Vimalapulinahārī āsī sabbattha maggo;  
Ayanamupagate te dantadhātuppabhāvā,  
Nigamanagaravāsī sādhu sammānayiṃsu.
324. Kusumasurabhicuṇṇākiṇṇahatthāhi niccā,  
Sakutukamanuyātā kānane devatāhī;  
Acalagahaṇaduggaṃ khepayitvāna maggaṃ,  
Agamumaturitā te paṭṭanaṃ tāmaliṭṭiṃ.
325. Acalapadarabaddhaṃ suṭṭhitodārakūpaṃ,  
Uditaputhulakāraṃ dakkhanīyāmakañca;  
Sayamabhimatalaṅkāgāminiṃ nāvamete,  
Sapadi samuparūḷhaṃ addasaṃ vāṇijehi.
326. Atha dijawabārā te sīhaḷaṃ gantumicchaṃ,  
Sarabhasa mupagantvā nāvikkassāvadimiṃsu;  
Sutisukhavacasā so sādhu vuttana cesāṃ,  
Pamuditahadayo te nāvamāropayittha.
327. Jalanidhimabhirūḷhesvesu ādāya dhātuṃ,  
Samabhavumupasannā lolakallolamālā;  
Samasurabhimanuñño uttaro vāyi vāto,  
Vimalarucirasobhā sabbathā'suṃ disā'pi.
328. Nabhasi asitasobhe venateyyo'va nāvā,  
Pabalapavanavegā sattataṃ dhāvamānā;  
Nayanavisayabhāvātītātīrācalādiṃ,  
Pavisi jaladhimaḷḷhaṃ pheṇapupphābhikiṇṇaṃ.
329. Atha abhavi samuddo bhīmasaṃvaṭṭavātā,  
Bhīhataśikharikūṭākāravācippabandho;  
Savanabhiduraghorārāvarundhantalikkho,  
Bhayacakitamanussakkandito sabbarattiṃ.
330. Udayasikharisīsaṃ nūtanādiccabimbe,  
Upagatavati tassā rattiya accayamhi;  
Salilanidhijalaṃ taṃ santakallolamālaṃ,  
Asitamaṇivicittaṃ koṭṭimaṃ'vāvabhāsi.
331. Atha vitataphaṇālī bhīmsanā keci nāgā,  
Surabhikusumahatthā keci dibbatabhāvā;  
Ruciramaṇipadīpe keci sandhārayantā,  
Nijasirasi karontā keci kaṇḍuppalānī.
332. Phuṭakumudakalāpe jattuneke vahantā,  
Kaṇakakalasaṃmālā ukkhipattā ca keci;  
Pavanacalitaketuggāhakā keci eke,  
Rucira kaṇaka cuṇṇāpuṇṇacaṅgoṭahatthā.

333. Salaḷitaramaṇiyaṃ keci naccaṃ karontā,  
Salayamadhuragītaṃ gāyamānā'va keci;  
Pacuraturiyabhaṇḍe āhanantā'va eke,  
Munivaratanudhātuṃ pūjituṃ uṭṭhahiṃsu.
334. Rucirakacakalāpā rājakaññāya tassā,  
Munivaradasanaṃ taṃ niggatevindulekhā;  
Ujurajatasalākā sannibhe muñci raṃsī.
335. Atulitamanubhāvaṃ dhātuyā pekkhataṃ taṃ,  
Pamuditahadayānaṃ taṅkhaṇe pannagānaṃ;  
Paṭiravaharītānaṃ sādhuvaḍḍādikānaṃ,  
Gaganamapariyantaṃ'vāsi vitthāritānaṃ.
336. Pavasi sugata dāṭṭhādhatu sā moḷigabbhaṃ,  
Puna gaganatalamhā otarivāna tassā;  
Phaṇḍharanivahā te taṃ tariṃ vārayitvā,  
Mahamakaramudāraṃ sattarattindivaṃhi.
337. Acalamiva vimānaṃ antalikkhamhi nāvaṃ,  
Gativirahitamamhorāsimaḷḷhamhi disvā;  
Bhayavilulitacittā jampaṭī te samaggā,  
Dasabalatanujaṃ taṃ iddhimantaṃ sariṃsu.
338. Sapadi munisuto so cittamesaṃ veditvā,  
Nabhasi jaladharālī maddamāno'bhigantvā;  
Vihagapatisarīraṃ māpayitvā mahantaṃ,  
Bhayacakitabhujāṅge te paḷāpesi khippaṃ.
339. Itthaṃ buddhisute bhujāṅgaḷḷanaṃ bhītiṃ sametvā gate,  
Sā nāvā pavanā pakampitadhajā tuṅgaṃ taraṅgāvaliṃ;  
Bhīndanti gativegasā puthutaraṃ meghāvalīsannibhaṃ,  
Laṅkāpaṭṭanamotarittha sahasā therassa tassiddhiyā.

Catuttho paricchedo.

340. Saṃvaccharamhi navamamhi mahādisena,  
Puttassa kittisirimeghanarādhipassa;  
Te jampaṭī tamatha paṭṭanamotaritvā,  
Devālaye paṭivasaiṃsu manobhirāme.
341. Disvāna te dvijavaro pathike nisāyaṃ,  
Santappayittha madhurāsanapānakehi;  
Rattikkhaye ca anurādhapurassa maggaṃ,  
Chāyāpatīnamatha so abhivedayittha.
342. Ādāya te dasanadhātuvaraṃ jinassa,  
Sammānitā dvijavarena'tha paṭṭanamhā;  
Nikkhamma dūratarāmaggamatikkamitvā,  
Padvāragāmamanurādhapurassa'gañchumaṃ.
343. Yaṃ dhammikaṃ naravaraṃ abhitakkayitvā,  
Jāyāpatī visayametamupāgamiṃsu;  
Taṃ vyādhiṇā samuditena mahādisena,  
Laṅkissaraṃsucirakālakataṃ suṇiṃsu.

344. Sokena te sikharineva samuggatena,  
Ajjhotthaṭā bahutaraṃ vilapīṃsu mulhā;  
Kāyīṃsu tesamatha mucchitamānasānaṃ,  
Sabbā disā ca vidisā ca ghanandhakārā
345. Sutvāna kittisirimeghanarādhipassa,  
Rajjeṭhitassa ratanattayamāmakattaṃ;  
Vassena nibbutamahādahanā'va kacchā,  
Te jampatī samabhavūṃ hatasokatāpā.
346. Sutvāna meghagirināmamahāvihāre,  
Bhikkhussa kassaci narādhipavallabhattaṃ;  
Tassa'ntikaṃ samupagamma katātithēyyā,  
Dhātuppavattimavadiṃsu ubho samecca.
347. Sutvāna so munivaro dasanappavattiṃ,  
Haṭṭho yathāmatarasena'hisittagatto;  
Gehe sake sapadi paṭṭavitānakehi,  
Vaḍḍhesi dhātumamalaṃ samalaṅkatamhi.
348. Tesañca jānipatikānamubhinnaṃeso,  
Katvāna saṅghamuḷāratarāṃ yathicchaṃ;  
Vuttantametamabhivedayitūṃ pasatthaṃ,  
Laṅkādhīpassa savidhaṃ paḥiṇittha bhikkhūṃ.
349. Rājā vasantasamaye saha kāminīhi,  
Uyyānakeḷisukha mekadine'nubhonto;  
Āgacchamānamatha tatha sudurato'ca,  
Taṃ vipasannamukhavaṇṇamaṃpassi bhikkhūṃ.
350. So saṃyami samupagamma narādhipaṃ taṃ,  
Vuttantametamabhivedayi tuṭṭhacitto;  
Sutvāna taṃ paramapītibharaṃ vahanto,  
Sampattacakkaratano'va ahosī rājā.
351. Laṅkissaro dvijavarā jinadantadhātu,  
Mādāya jānipatayo ubhaye samecca;  
Essanti laṅkamacirena itīritaṃ taṃ,  
Nemittikassa vacanañca tathaṃ amaññi.
352. Rājā tato mahatīyā parisāya saddhiṃ,  
Tassānurādhanagarassa puruttarāya;  
Āsāya taṃ sapadi meghagiriṃ vihāraṃ,  
Saddho agañchi padasā'va pasannacitto.
353. Disvā tato sugatadhātumalabbhaneyyaṃ,  
Ānandajassunivahehi ca tārahāraṃ;  
Siñcaṃ vidhāya paṇidhiṃ bahumānapubbaṃ,  
Romaṅcakaṅcukadharo iti cintayittha.
354. So'haṃ anekaratanujjalamoḷidhāriṃ,  
Pūjeyyamajja yadi duccejamuttamaṅgaṃ;  
Lokattayekasaraṇassa tathāgatassa,  
No dhātuyā mahamanucchavikaṃ kareyyaṃ.



355. Etaṃ pahūtaratanam sadhanam sabhoggam,  
Sampūjayam api dharāvalayam asesam;  
Pūjam karomi tadanucchavikam aham'ti,  
Cinteyya kahi bhuvanesu amūhatitto.
356. Laṅkādhīpaccamidamappataram mamāsi,  
Buddho guṇehi vividhehi pamāṇa suñño;  
So'ham parittavibhavo tibhavekanātham,  
Tam tādīsam dasabalam kathamaccayissam.
357. Ittham punappuna tadeva vicintayanto,  
Āpajji so dhitiyuto'pi visaññibhāvam;  
Samvījito sapadi cāmaramārutena,  
Khinnena sevakajanena alattha saññam.
358. Thokampi bījamatha vā abhiropayantā,  
Medhāvino mahatiyā'pi masundharāya;  
Kālena patta tava pupphaphaladikāni,  
Vindanti patthitaphalāni anappakāni.
359. Evaṃ guṇehi vividhehi'pi appameyya,  
Dhammissaramhi mahamappatarampi katvā;  
Kālaccayena pariṇāma visesarammam,  
Saggāpavaggasukhamappaṭimam labhissam.
360. Ittham vicintiya pamodabharātireka,  
Sampunṇacandimasarikkhamukho narindo;  
Sabbañño dasanadhātuvarassa tassa,  
Pūjesi sabbamapi sīhaladīpametam.
361. Bhikkhū'pi tepiṭaka jātakabhāṇakādi,  
Takkagamādi kusalā api buddhimanto;  
Vatthuttayekasaraṇā api poravaggā,  
Kotuhalā sapadi sannipatimsu tattha.
362. Rājā tato mahatiya parisāya majjhe,  
Iccabruvī munivaro hi susukkadāṭho;  
Dāṭhā jinassa yadi osadhīrākā'va,  
Setā bhavyeaya kimayam malināvabhāsā.
363. Tasmim khaṇe dasanadhātu munissarassa,  
Pakkhe pasāriya duve viya rājahamsī;  
Vithāritam'suni vahā gagananānamhi,  
Āvaṭṭato chavi javena muhuttamattam.
364. Paccagghamattharaṇakam sitamattharivā,  
Bhaddāsanamhi vinidhāya munindadhātum;  
Tam jātipupphanikarena thakesi rājā,  
Vassaccayambudharakūṭasamappabhena.
365. Uggamma khippamatha dhātu munissarassa,  
Sā puppharāsīsikhamamhi patiṭṭhahitvā;  
Raṃsīhi duddhadhavalehi virocāmānā,  
Sampassatam animise nayane akāsi.

366. Taṃ dhātumāsanagatamhi patitṭhapetvā,  
Khīrodaeṇepāṭalappaṭime dukule;  
Chādesi sāṭakasatehi mahārahehi,  
Bhiyyo'pi so upaparikkhitukāmatāya.
367. Abbhuggatā sapadi vatthasatāni bhettvā,  
Setambudodaraviniggatacandimā'va;  
Ṭhatvāna sā upari tesamabhāsayingittha,  
Raṃsīhi kundavisadehi disā samantā
368. Tasmim̐ khāṇe vasumatī saha bhūdharehi,  
Gajjittha sādhuvacanaṃ'va samuggirantī;  
Taṃ abbhūtaṃ viya samekkhitumamburāsi,  
So niccalo abhavi santataraṅgabāhu.
369. Mattebhakampitasupupaphitasālato'va,  
Bhassim̐su dibbakusumāni'pi antaḷikkhā;  
Naccesu cāturiyayamacchariyaṃ janassa,  
Sandassayim̐su gagane surasundarī'pi.
370. Ānandasañjanitatāraravābhirāmaṃ,  
Gāyim̐su gītamamatāsanagāyakā'pi;  
Muñcim̐su dibbaturiyāni'pi vādītāni,  
Gambhīramuccamadhuraṃ dviguṇaṃ ninādaṃ.
371. Saṃsibbitaṃ rajatarajjusatānukārī,  
Dhārāsatehi vasudhambaramambudena;  
Sabbā disā jaladakuṭamahagaghiyesu,  
Dittācirajjutipadīpasatāvabhāsā.
372. Ādhuyamāna malayāvala kānananto,  
Samathulla pupphaja parāgaharābhīhāri;  
Sedoda bindugaṇa saṃharaṇappavīṇo,  
Mandaṃ avāsi sisiro api gandhavāho.
373. Rājā tamabbhutamavekkhiya pāṭihīraṃ,  
Lokussavaṃ bahutaraṅga aditṭhapubbaṃ;  
Cippāritakkiyugalo paramappamodā,  
Pūjaṃ karittha mahatiṃ ratanādikehi.
374. So dhātumattasirasā'tha samubbahanto,  
Ṭhatvā samussita sitātapavāraṇamhi;  
Cittatthare rathavare sitavājjiyutte,  
Lakkhinidhānanurādhapuraṃ pavekkhi.
375. Devinda mandira same samalaṅkatamhi,  
Rājā sakamhi bhavane atulānubhāvo;  
Sīhāsane paṭika kojāva santhatamhi,  
Dhātuṃ ṭhapesi munino sasitātapatte.
376. Anto'va bhūmipati dhātugharaṃ mahagghaṃ,  
Katvāna tattha vinidhāya munindadhātuṃ;  
Sampūjayittha vividhehi upāyanehi,  
Rattīndivaṃ tidivamokkha sukhābhikaṅkhī.

377. Tesañca jānipatikānamubhinnameva,  
Tuṭṭho bahūni ratanābharaṇādikāni;  
Gāmecca issarakuleka nīvāsabhute,  
Datvāna saṅghamakāsi tisīhaḷindo.
378. Saṅgama jānapada negama nāgarādī,  
Ukkaṇṭhitā sugatadhātumapassamānā;  
Lokuttamassa caritāni abhitthavantā,  
Ugghosayiṃsu dharaṇīpatisannidhāni;  
Dhammissaro sakalalokahitāya loke,  
Jāyittha sabbajanatāhitamācarittha;  
Vitthāritā bahujanassa hitāya dhātu,  
Icchāma dhātumabhipūjayitum mayampi.
380. So sannipātiya mahīpati bhikkhusaṅgha,  
Mārāmavāsīmanurādhapuropakaṇṭhe;  
Ajjhāsayaṃ tamabhivedayi satthudhātu,  
Pūjāya sannipatitassa mahājanassa.
381. Thero tahiṃ mahati bhikkhugaṇe paneko,  
Medhābalena asamo karuṇādhivāso;  
Evaṃ tisīhaḷapatissa mahāmatissa,  
Lokathacāraturassa nivedayittha.
382. Yo ācareyya anujīvijanassa atthaṃ,  
Eso bhavē' nucarito mahataṃ sabhāvo;  
Dhātuṃ vasantasamaye bahi nīharitvā,  
Dassehi puññamabhipatthayataṃ janānaṃ.
383. Sutvāna saṃyamivarassa subhāsītāni,  
Pucchittha so naravaro puna bhikkhusaṅghaṃ;  
Dhātuṃ namassitumanena mahājanena,  
Ṭhānaṃ kimettha ramaṇīyatarāṃ siyā'ti.
384. Sabbe'pi te atha nikāya nivāsi bhikkhū,  
Ṭhānaṃ sakaṃ sakama vaṇṇayumādarena;  
Aññoññabhinnavacanesu ca tesu rājā,  
Nevābhinandi na paṭikkhipi kiñcivākyāṃ.
385. Majjhataṭṭānugata mānasatāya kintu,  
Rājā avo ca puna bhikkhugaṇassa majjhe;  
Attānurūpamayameva munindadhātu,  
Ṭhānaṃ khaṇena sayameva gamissatīti.
386. Rājā tato bhavānameva sakaṃ upecca,  
Dhātuppaṇāmaṃ abhipatthayataṃ janānaṃ;  
Khippaṃ mukhambujavanānī vikāsayanto,  
Sajjetumāha nagarañca vihāramaggaṃ.
387. Sammajjitā salila sevana santadhūlī,  
Racchā tadā'si pulinattharaṇābhīrāmā;  
Ussāpitāni kaṇakādivicittitāni,  
Vyagghādi rūpakhacitāni ca toraṇāni.
388. Chāyā nivārita virocana raṃsitāpā,  
Naccaṃ'va dassayati vātadhūtā dhajāli;  
Vīthi vasantavānarāji samānavāṇṇā,

Jātā sujātakadalītarumālikāhi.

- 389.** Samsūcayanti ca satam navapuṇṇakumbhā,  
Saggāpavaggasukhamicchitamijjhatīti;  
Kappurasāratagarāgarusambhavehi,  
Dhūpehi duddinamatho sudinaṃ ahoṣi.
- 390.** Olambamānasitamuttakajālakāni,  
Sajjāpitāni vividhāni ca maṇḍapāni;  
Sampādītāni ca tahiṃ kusumagaghikāni,  
Āmoda luddha madhupāvali kujitāni.
- 391.** Gacchiṃsu keci gahitussava vesasobhā,  
Eke samuggaparipuritapupphahatthā;  
Aññe janā surabhiṃcuṇṇabharam vahanā,  
Tatthetare dhatavicittamahātapattā.
- 392.** Laṅkissaro'tha sasipaṇḍaravājjiyutte,  
Ujjotite rathavare ratanappabhāhi;  
Dhātuṃ tilokatilakassa patiṭṭhapetvā,  
Etaṃ avoca vacanaṃ paṇipātapubbaṃ.
- 393.** Sambodhiyā iva munissara bodhimaṇḍam,  
Gaṇḍambarukkhamaiva titthiyamaddanāya;  
Dhammañca saṃvibhajituṃ migadāyamajja,  
Pūjānurūpamupagaccha sayam padesaṃ.
- 394.** Rājā tato samucitācaraṇesu dakkho,  
Vissajji phussarathamaṭṭhitasārathim taṃ;  
Pacchā sayam mahatiyā parisāya saddhim,  
Pūjāvīsesamasamaṃ agamā karonto.
- 395.** Ukkuṭṭhinādavisarena mahājanassa,  
Hesāravena viṣaṇena turaṅgamānaṃ;  
Bherīravena mahatā kari gajjītena,  
Uddāmasāgara samaṃ nagaraṃ ahoṣi.
- 396.** Āmoditā ubhayavīthigatā kulitthi,  
Vātāyanehi kanakābharaṇe khipiṃsu;  
Sabbatthakaṃ kusumavassamavassayimṣu,  
Celāniceva bhamayimṣunijuttamaṅge.
- 397.** Pācīnagopurasamīpamupāgatamhi,  
Tasmim rathe jaladhipiṭṭhigate'va pote;  
Tuṭṭhā tahiṃ yatigaṇā manuḍā ca sabbe,  
Sampujayimṣu vividhehi upāyanehi.
- 398.** Katvā padakkhiṇamatho puramuttarena,  
Dvārena so rathavaro bahi nikkhamitvā;  
Ṭhāne mahindaminudhammakathāpavitte,  
Aṭṭhāsi titthagamitā iva bhaṇḍanāvā.
- 399.** Ṭhāne tahiṃ dasanadhātuvaraṃ jinassa,  
Laṅkissaro ratanavittakaraṇḍagabbhā;  
Saṅghāghanā iva vidhuṃ bahinīharitvā,

Dassesi jānapada negama nāgarānaṃ.

400. Tasmim̐ jane sapadi ābharaṇādivassa,  
Maccantapītibharite abhivassayante;  
Sānandivandijanamaṅgalagītakehi,  
Sampāditesu mukharesu disāmukhesu.
401. Hatthāravindanivahesu mahājanassa,  
Candodaye'ca mukulattanamāgatesu;  
Brahmāmarādijanitāmita sādhuvāde,  
Tārāpathamhi bhuvanodara mottharante.
402. Sādantadhātu sasikhaṇḍa samānavañṇā,  
Raṃsīhi kunda navacandana paṇḍarehi;  
Pāsāda gopura siluccaya pādapādīm̐,  
Niddhota rūpiyamayaṃ'va akā khaṇena.
403. Taṃ pāṭihāriya macintiya maccuḷāraṃ,  
Disvāna ke tahīmahesu mahaṭṭhalomā;  
Kevā'nayaṃ sakasakābharaṇāni gehaṃ,  
Kevā na attapaṭilābhamavañṇayimsu.
404. Ke nojahimsu sakadiṭṭhimalānubaddhaṃ,  
Ke vā na buddhamahimaṃ abhipatthayimsu;  
Ke nāma macchariyapāsavasā ahesuṃ,  
Vatthutayañca saraṇaṃ nagamimsu kevā.
405. Laṅkissaro'pi navalakkha paribbayena,  
Sabbaññudhātumatulaṃ abhipūjayitvā;  
Taṃ dantadhātubhavanaṃ puna vaḍḍhayitvā,  
Antepuramhi paṭivāsaramaccayittha.
406. Dhātuṃ vihāramahayuttarameva netvā,  
Pūjaṃ vidhātumanuvaccharamavarūpaṃ;  
Rājā'tha kittisirimeghasamavhaya so,  
Vārittalekha mabhilekhyi saccasandho.
407. Vārittametamitare'pi pavattayantā,  
Te buddhadāsapamukhā vasudhādhināthā;  
Saddhādayādhikaguṇābharaṇābhirāmā,  
Taṃ sakkarimsu bahudhā jinadantadhātuṃ.
408. Sathārā sambhatatthaṃ purimatarabhava sampajānaṃ pajānaṃ,  
Sambodhiṃ tassa sabbāsavavigamakarim̐ saddahanto'dahanto;  
Sotaṃ tassa'ggadhamme nipuṇamati sataṃ saṅgamesaṅgamesaṃ,  
Nibbānaṃ santamicche tibhavabhayapariccāgahetuṃ gahetuṃ.

Pañcama paricchedo.

409. Yo candagomi racitevarasaddasatthe,  
Ṭīkaṃ pasatthamakarittha ca pañcikāya;  
Buddhappabhāvajana niṃca akā samanta,  
Pāsādikāya vinayaṭṭhakathāya ṭīkaṃ.
410. Aṅguttarāgamavaraṭṭhakathāya ṭīkaṃ,

Sammobhavibbhama vighātakariṃ akāsi;  
 Atthāya saṃyamigaṇassa padhānikassa,  
 Ganthaṃ akā vinayasaṅgahanāmadheyyaṃ.

- 411.** Santindriyassapaṭipatti parāyaṇassa,  
 Sallekha vutti niratassa samāhitassa;  
 Appicchatādi guṇayoga vibhusanassa,  
 Sambuddhasāsanamahodayakāraṇassa.
- 412.** Sabbesuācariyataṃ paramaṃ gatassa,  
 Satthesu sabbasamayantara kovīdassa;  
 Sissenasāritanujassa mahādisāmi.
- 413.** Suddhanvayena karuṇādiguṇodayena,  
 Takkāgamādi kusalena visāradena;  
 Sabbattha patthaṭa sudhākararaṃsijāla,  
 Saṅkāsakittivisarena parikkhakena.
- 414.** Saddhādhanena sakhilena ca dhammakitti,  
 Nāmena rājagarunā cariyena eso;  
 Sotuppasādajanano jinadantadhātu,  
 Vaṃso kato nikhiladassipabhāvadīpo.
- 415.** Dhammo pavattatu cirāya munissarassa,  
 Dhamme ṭhitā vasumatīpatayo bhavantu;  
 Kāle pavassatu ghano nikhilā pajā' pi,  
 Aññoññamettipaṭilābhasukhaṃ labhantu.